



PRIMA SESSIONE URDINARIA DI U 2022

24 È 25 DI FERRAGHJU DI U 2022

1ERE SESSION ORDINAIRE DE 2022

24 ET 25 FEVRIER 2022

N° 2022/01/017

**Question orale déposée par Véronique PIETRI
au nom du Groupe « Core In Fronte »**

OBJET : Par a salvezza di u bè siciali di u cumplessu d'alata e contr'à a spiculazioni

Allora chì, pochi ghjorni fà, era aduttata in prima littura à l'Assemblea Naziunali Francesa una pruposta di leggi, difesa è purtata da u diputatu Acquaviva, considerata da a vostra magiurità com'a impurtanti pà luttà contr'à u fenomenu di spiculazioni fundaria e immobiliare, parmittendu à a nostra cullettività di metta in ballu u so drittu di prianzioni, una dura rialità si ghjoca quì, in a difesa di l'intaressi di u Populu Corsu, nantu à a so tarra, com'à quì in a cumuna d'Alata.

Cumencia st'affari incù a vulintà di a municipalità di salvà di u smembramentu è di a spiculazioni a residenza albergu à valori siciali di u Paesi di Lava. Voli fà vale u so drittu di prianzioni, postu chì stu drittu hè dighjà soiu.

Dumanda allora aiutu à i so partinari stituzionali cumu a Cummunità d'Agglomerazioni di u Paesi Aiaccinu chì anc'eddu hà aduttatu à l'unanimità a missa in ballu di st'arnesu.

Ci voli à sapè chì, un ingaghjamentu finanziaru era statu presu in u Pianu di Trasformazioni è di l'Invistimentu pà a Corsica, appuntu privistu par a rinovazioni energetica di Paesi di Lava, parchi chì, dipoi dui anni è i prublemi di stu cumplessu, a cumuna d'Alata avia travagliatu assai nantu à u cartularu.

Un antru partinariu hè a nostra Cullettività, pà l'intramessa di u so Uffiziu Fundariu, criatu pà intarvena è purtà i cartulari finanziari di a prianzioni, quand'eddu ùn faci micca da par eddu ghjucà st'arnesu, com'eddu t'hà a pussibilità di fà la.

Una dumanda hè dunqua stata fatta à l'Uffiziu Fundariu pà mutualizzà mezzi in u quadru d'issu cartulari finanziariu è una deliberazioni di u cunsigliu municipale di u 16 di dicembri di u 2021 avia datu u so drittu di prianzioni à l'Uffiziu, ma, ùn hè statu pussibili l'aiutu.

À creda chì, postu chì Alata ùn hè nant'à l'isula di Cavallu, un c'hè bisognu di attivà st'arnesu di a prianzioni...

Simi, in tarra corsa cunfruntati ogni ghjornu à ssa prissioni spiculative è, in tantu chì cullettività di Corsica ùn pudemi stà senza fà nunda.

Hè un esempiu, st'affari, di a nostra incapacità à pruteghja u nostru bè cumunu, tarri, monumenti, siti archeologichi... dev'essa più maiò a nostra ambizioni d'evoluzioni statutaria è di quadri.

Vi femi dunqua sti dumandi :

Chì cunteti di fà in stu cartularu ?

Chì visioni strategica vuleti metta in piazza incù stu drittu di prianzioni?

Da u dì à u fà : quandu cunteti di passà da i discorsi d'intenzioni à l'atti, aspittati da assai di i nostri paisani par ch'idda sia rispittata a nostra tarra e i so bè à u nomu di l'intaressu cullettivu ?